

Oranjestad – E curso Empresario Independiente Chikito/Mediano 2015-2016, cu a inicia na October aña pasa, a marca e di dos sesion pa loke ta trata e curiculo diseña pa Camara di Comercio y Industria Aruba (KvK) special pa e empresa chikito/mediano (SMEs).

Despues di 6 luna intensivo di les semanal e curso aki a finalisa exitosamente. Consistiendo di un cantidad amplio di topico manera marketing, legislacion, finanzas y administracion, impuesto, recurso humano y varios otro aspecto di negoshi, e curso sigur ta amplia conocimiento di e participante.

E intencion ta, como parti di KvK su tareanan, pa informa y educa e (futuro) empresario pa ta miho prepara na momento di establece y maneha su negoshi.

Pa e participantenan e periodo di curso no tabata algo facil pero un periodo extenso cu a rekeri hopi dedicacion y trabou duro pa por pasa nan examen cu exito. Algun persona tin un negoshi caba y otro tin nan trabou diario pues e estudio y preparacion pa cada les den oranan liber sigur ta un sacrificio.

Un total di 14 participante (di 20) a logra termina e examen cu exito y a ricibi nan certificado pa esaki.

Entrega di certificado a tuma luga diamars, 14 di juni 2016 na KvK, sigui pa un celebracion ameno cu familiar y amistades. Entrega a ser haci pa Director Ejecutivo di KvK Sra. Sonja Velthuisen kende a hiba palabra di elogio na cada participante pa e esfuerzo y logro pa e curso. Tambe a hiba palabra Sr. Dave Martinus, un di e docentenan di e curso y kende tambe ta encarga cu e parti di 'coaching' cu ta ser ofreci na cada cursista como parti di e pakete. Na final di e ceremonia di entrega cursistanan a ricibi un sorpresa ameno, unda cu Sr. Bert Vermaas di VCC International a anuncia cu su compania ta ofrece e software Payroll Pro completamente gratis na e cursista cu inscribi su negoshi na KvK dentro di 3 luna. Esaki sigur a cai na agrado di un y tur y algun cursista ya a indica di lo probecha di e tremendo oferta aki.

E certificado cu participantenan a ricibi despues di a gradua pa nan examen ta comparabel cu e 'middenstands-diploma' na Hulanda. E ta uno di gran balor tanto pa e persona como pa su negoshi y cu lo ser registra tambe na Camara di Comercio na momento cu e negoshi wordo inscribi.

Palabranan di gratitud ta bai na tur esnan cu a coopera na realisa e curso aki, Dave Martinus, Leo Maduro, Patrick Melchiors, Bruce Harms, Ryan Maduro, Guido Picus, Bert Vermaas, Dick Rikkengaa, Herbert Diaz, Frank Snijders y e team di WTS, Goswino Oduber, Boy Ecury, Roberto Lejuez y Olivier de Jong.

Despues di dos edicion exitoso di curso Empresario Independiente Chikito/Mediano, KvK ta cla pa cuminsa prepara pa e tercer curso. E proceso pa esaki lo inicia dentro di poco pa cual esnan interesa por cuminsa inscribi. Manera custumber, e periodo di curso number tres lo ta di October 2016 pa April 2017.

KvK ta spera di por sigui brinda e apoyo y educacion necesario pa un y tur cu kier cuminsa cu su empresa por ta bon prepara pa esaki.

Tur esnan cu kier participa den e siguiente curso, of haya mas informacion por tuma contacto cu Sra. Sue-Ellen Farro-de Freitas Sousa na businessinfo@arubachamber.com.

Camara di Comercio y Industria Aruba (KvK)

15 di juni 2016

